

**განმარტებითი ბარათი  
საქართველოს კანონის პროექტზე**

**„საქართველოს ადმინისტრაციულ სამართალდარღვევათა კოდექსში  
ცვლილების შეტანის შესახებ“**

**ა) ზოგადი ინფორმაცია კანონპროექტის შესახებ:**

**ა.ა) კანონპროექტის მიღების მიზეზი:**

**ა.ა.ა) პრობლემა, რომლის გადაჭრასაც მიზნად ისახავს კანონპროექტი:**

როგორც პრაქტიკამ აჩვენა, ბოლო დროს გახშირებულია შემთხვევები, როდესაც სასოფლო-სამეურნეო სავარგულების მფლობელები, მოსავლის აღების შემდგომ ახდენენ მიწის ნაკვეთზე დარჩენილი ნაწვერალისთვის ცეცხლის წაკიდებას დაწვის მიზნით, რაც დიდ ზიანს აყენებს როგორც ნიადაგს ასევე გარემოს, არსებობს მიმდებარე ნაკვეთებზე, მინდვრებზე, ტყეებზე ან დასახლებულ პუნქტებზე ხანძრის გავრცელების ძალიან დიდი ალბათობა, რამაც შესაძლებელია შეუქცევადი შედეგები გამოიღოს. მიზანშეწონილია ასეთი ქმედებისათვის არსებობდეს შემაკავებელი ეფექტის მქონე მკაცრი ადმინისტრაციული ჯარიმა.

ამასთან, ხშირია შემთხვევები როდესაც სახერხი საამქროების მიერ სპეციალური ფირნიშის საკონტროლო ფირნიშის დადგენილი წესის ან ვადის დარღვევით წარდგენის შემთხვევაში არსებული საჯარიმო სანქცია ვერ უზრუნველყოფს შემაკავებელ ეფექტს და აუცილებელია თითოეული წამოუდგენელი საკონტროლო ფირნიშისთვის დადგინდეს დამატებით საჯარიმო სანქცია. სახერხი საამქროს მფლობელი ვალდებულია, ყოველთვიური ანგარიშგების მიზნით, ყოველი მომდევნო თვის 10 რიცხვის ჩათვლით, სახელმწიფო საქვეუწყებო დაწესებულება - გარემოსდაცვითი ზედამხედველობის დეპარტამენტს ან მის ტერიტორიულ ორგანოს, სახერხი საამქროს ადგილმდებარეობის მიხედვით, წარუდგინოს ყოველი თვის პირველი რიცხვიდან მომდევნო თვის პირველ რიცხვამდე საანგარიშო პერიოდში გადამუშავებული ან ფანერის (შპონის) წარმოების მიზნით მრგვალი ხე-ტყის (მორის) წინასწარ დამუშავებული მრგვალი ხე-ტყის (მორის) საკონტროლო ფირნიშები. არის შემთხვევები, როდესაც სახერხი საამქროები გამიზნულად არ წარმოადგენენ საკონტროლო ფირნიშებს და ხდება წარმოუდგენელი საკონტროლო ფირნიშების განმეორებით გამოყენება (ანუ ხდება უკანონო მორების დაფირნიშება ერთხელ უკვე გამოყენებული და წარმოუდგენელი ფირნიშებით). შესაბამისად, საჭიროა დაწესდეს საჯარიმო სანქცია წარმოუდგენელი თითოეული საკონტროლო ფირნიშისთვის.

**ა.ა.ბ) არსებული პრობლემის გადასაჭრელად კანონის მიღების აუცილებლობა:**

კანონპროექტის შემუშავების აუცილებლობა განპირობებულია იმ გარემოებით, რომ ადმინისტრაციული ჯარიმის დაწესება შესაძლებელია მხოლოდ აღნიშნულ კანონში ცვლილების შეტანით.

**ა.ბ) კანონპროექტის მოსალოდნელი შედეგები:**

კანონპროექტის მიღების შედეგად, დაწესდება საჯარიმო სანქცია მიწის ნაკვეთზე არსებული მარცვლოვანი მცენარეების ნაწვერალისთვის ცეცხლის წაკიდებისთვის და სახერხი საამქროს მიერ

თითოეული წარმოდგენელი საკონტროლო ფირნიშის შემთხვევაში დადგინდეს დამატებით საჯარიმო სანქცია რასაც ექნება შემაკავებელი ეფექტი.

**ა.გ) კანონპროექტის ძირითადი არსი:**

კანონპროექტის შესაბამისად:

კოდექსს ემატება ახალი 52<sup>1</sup> მუხლი, რომლის შესაბამისად - მიწის ნაკვეთზე არსებული მარცვლოვანი მცენარეების ნაწვერალისთვის ცეცხლის წაკიდება, გამოიწვევს ფიზიკური პირის დაჯარიმებას 1 000 ლარის ოდენობით თითოეულ ჰექტარ გადამწვარ მიწის ნაკვეთზე, ხოლო იურიდიული პირის დაჯარიმებას 2 000 ლარის ოდენობით თითოეულ ჰექტარ გადამწვარ მიწის ნაკვეთზე, ხოლო 1 ჰექტარამდე მიწის ნაკვეთის გადაწვის შემთხვევაში, სამართალდამრღვევს დაეკისრება 1 ჰექტარი მიწის გადაწვისთვის ამ მუხლით დადგენილი ჯარიმა, ხოლო 1 ჰექტარზე ზემოთ - ფაქტობრივად გადამწვარი მიწის ნაკვეთის ფართობის შესაბამისად. აღნიშნული საჯარიმო სანქციები გამოიწვევს მიწის ნაკვეთის მესაკუთრე ან მფლობელი ფიზიკური პირისა ან იურიდიული პირის დაჯარიმებას ზემოხსენებული საჯარიმო სანქციის ფარგლებში;

128<sup>3</sup> მუხლის პირველი და მე-2 ნაწილში ხორციელდება ცვლილება, რომლის შესაბამისადაც, თითოეული წარმოდგენელი საკონტროლო ფირნიშისთვის სახერხ საამქროს დამატებით დაეკისრება 50 ლარის გადახდა, შესაბამისად სახერხი საამქროს მიერ 10 საკონტროლო ფირნიშის წარმოდგენლობის შემთხვევაში დაეკისრება ჯარიმა  $500 + 10 \times 50 = 1000$  ლარის ოდენობით. აღნიშნული ქმედებისათვის საჯარიმო სანქცია დღეის მდგომარეობით, მიუხედავად წარმოდგენელი საკონტროლო ფირნიშების ოდენობისა, არის 500 ლარი რაც თავის მხრივ არ ქმნის შემაკავებელ ეფექტს სახერხ საამქროებისათვის, ვინაიდან არის შემთხვევები, როდესაც ხდება წარმოდგენელი საკონტროლო ფირნიშების განმეორებით გამოყენება (ანუ ხდება უკანონო მორების დაფირნიშება ერთხელ უკვე გამოყენებული და წარმოდგენელი ფირნიშებით) .

**ა.დ) კანონპროექტის კავშირი სამთავრობო პროგრამასთან და შესაბამის სფეროში არსებულ სამოქმედო გეგმასთან, ასეთის არსებობის შემთხვევაში (საქართველოს მთავრობის მიერ ინიცირებული კანონპროექტის შემთხვევაში):**

ასეთი არ არსებობს.

**ა.ე) კანონპროექტის ძალაში შესვლის თარიღის შერჩევის პრინციპი, ხოლო კანონისთვის უკუძალის მინიჭების შემთხვევაში, აღნიშნულის თაობაზე შესაბამისი დასაბუთება:**

წარმოდგენილი კანონპროექტის ძალაში შესვლის თარიღად განსაზღვრულია მისი გამოქვეყნების თარიღი, ვინაიდან, მნიშვნელოვანია მისი დროული ამოქმედება. კანონპროექტი არ ითვალისწინებს კანონისთვის უკუძალის მინიჭებას.

**ა.ვ) კანონპროექტის დაჩქარებული წესით განხილვის მიზეზები და შესაბამისი დასაბუთება (თუ ინიციატორი ითხოვს კანონპროექტის დაჩქარებული წესით განხილვას):**

კანონპროექტის დაჩქარებული წესით განხილვა მოთხოვნილი არ არის.

**ბ) კანონპროექტის ფინანსური გავლენის შეფასება საშუალოვადიან პერიოდში (კანონპროექტის ამოქმედების წელი და შემდგომი 3 წელი):**

**ბ.ა) კანონპროექტის მიღებასთან დაკავშირებით აუცილებელი ხარჯების დაფინანსების წყარო:**

კანონპროექტის მიღება დაკავშირებული არ არის დამატებით ხარჯებთან, ვინაიდან, კოდექს ემატება ახალი 52<sup>1</sup> მუხლი რომლის ადმინისტრირებასაც განახორციელებს საქართველოს გარემოს დაცვისა და სოფლის მეურნეობის სამინისტროს სისტემაში შემავალი სსდ გარემოსდაცვითი ზედამხედველობის დეპარტამენტი, არსებული ადამიანური და ფინანსური რესურსების ფარგლებში, ხოლო 128<sup>3</sup> მუხლის ადმინისტრირებას დღესაც ახორციელებს.

**ბ.ბ) კანონპროექტის გავლენა სახელმწიფო, ავტონომიური რესპუბლიკის რესპუბლიკური ან/და მუნიციპალიტეტის ბიუჯეტის საშემოსავლო ნაწილზე:**

კანონპროექტი გავლენას მოახდენს სახელმწიფო ბიუჯეტზე, კერძოდ გაიზრდება სახელმწიფო ბიუჯეტის შემოსულობები, ვინაიდან სსდ გარემოსდაცვითი ზედამხედველობის დეპარტამენტის მიერ კანონპროექტით გათვალისწინებული ადმინისტრაციული სამართალდარღვევებისთვის გადახდევინებული ჯარიმები ექვემდებარება სახელმწიფო ბიუჯეტში ჩარიცხვას. გავლენის ოდენობა დამოკიდებული იქნება სამართალდარღვევათა რაოდენობაზე. 2023 წლის 10 თებერვალს არსებული სტატისტიკის მიხედვით 2021-2022 წლებში ასკ 128<sup>3</sup> პირველი და მე-2 ნაწილების დარღვევის გამო სულ შედგენილია ადმინისტრაციული სამართალდარღვევის 818 ოქმი, ხოლო ამავე წლებში არსებული სტატისტიკის თანახმად, სახერხი საამქროს მიერ გადამუშავებული მორის შესაბამისი საკონტროლო ფირნიშის წარმოუდგენლობა ფიქსირდება შემდეგნაირად:

№	რეგიონები	წარმოუდგენელი ფირნიშები
1	სამეგრელო-ზემო სვანეთი	3,606
2	რაჭა-ლეჩხუმი, ქვემო სვანეთი	2,004
3	შიდა ქართლი	810
4	კახეთი	525
5	მცხეთა-მთიანეთი	280
6	აჭარა	230
7	გურია	177
8	ქვემო ქართლი	122
9	სამცხე-ჯავახეთი	105
10	იმერეთი	76
11	თბილისი	2
<b>სულ ჯამი:</b>		<b>7,937</b>

კანონპროექტი გავლენას არ მოახდენს ავტონომიური რესპუბლიკის რესპუბლიკური ან/და მუნიციპალიტეტის ბიუჯეტის საშემოსავლო ნაწილზე;

**ბ.გ) კანონპროექტის გავლენა სახელმწიფო, ავტონომიური რესპუბლიკის რესპუბლიკური ან/და მუნიციპალიტეტის ბიუჯეტის ხარჯვით ნაწილზე:**

კანონპროექტის მიღება გავლენას არ მოახდენს სახელმწიფო, ავტონომიური რესპუბლიკის რესპუბლიკური ან/და მუნიციპალიტეტის ბიუჯეტის ხარჯვით ნაწილზე, ვინაიდან, 52<sup>1</sup> მუხლის ადმინისტრირებას განახორციელებს საქართველოს გარემოს დაცვისა და სოფლის მეურნეობის სამინისტროს სისტემაში შემავალი სსდ გარემოსდაცვითი ზედამხედველობის დეპარტამენტი, არსებული ადამიანური და ფინანსური რესურსების ფარგლებში და დამატებითი ფინანსები საჭირო არ იქნება, ხოლო 128<sup>3</sup> მუხლის ადმინისტრირებას დღესაც ახორციელებს.

**ბ.დ) სახელმწიფოს ახალი ფინანსური ვალდებულებები, კანონპროექტის გავლენით სახელმწიფოს ან მის სისტემაში არსებული უწყების მიერ მისაღები პირდაპირი ფინანსური ვალდებულებების (საშინაო ან საგარეო ვალდებულებები) მითითებით:**

კანონპროექტი არ ითვალისწინებს სახელმწიფოს ახალ ფინანსურ ვალდებულებებს, აგრეთვე სახელმწიფოს ან/და მის სისტემაში არსებული უწყების მიერ მისაღები პირდაპირი ფინანსური ვალდებულებებს.

**ბ.ე) კანონპროექტის მოსალოდნელი ფინანსური შედეგები იმ პირთათვის, რომელთა მიმართაც ვრცელდება კანონპროექტის მოქმედება, იმ ფიზიკურ და იურიდიულ პირებზე გავლენის ბუნებისა და მიმართულების მითითებით, რომლებზედაც მოსალოდნელია კანონპროექტით განსაზღვრულ ქმედებებს ჰქონდეს პირდაპირი გავლენა:**

პირებს პომლებიც ჩაიდენენ კანონპროექტით გათვალისწინებულ დარღვევას დაეკისრებათ ამავე კანონპროექტით გათვალისწინებული ადმინისტრაციული პასუხისმგებლობა (ჯარიმა).

**ბ.ვ) კანონპროექტით დადგენილი გადასახადის, მოსაკრებლის ან სხვა სახის გადასახდელის (ფულადი შენატანის) ოდენობა შესაბამის ბიუჯეტში და ოდენობის განსაზღვრის პრინციპი:**

კანონპროექტის შესაბამისად, მიწის ნაკვეთზე არსებული მარცვლოვანი მცენარეების ნაწვერალისთვის ცეცხლის წაკიდებისთვის წესდება ახალი ადმინისტრაციული ჯარიმა ფიზიკური პირებისთვის 1 000 ლარის ოდენობით თითოეულ ჰექტარზე, ხოლო იურიდიული პირებისთვის 2 000 ლარის ოდენობით თითოეულ ჰექტარზე. საჯარიმო სანქციის შემოღების საჭიროება გამომდინარეობს იმ გარემოებიდან, რომ სასოფლო-სამეურნეო სავარგულების მფლობელები, მოსავლის აღების შემდგომ ახდენენ მიწის ნაკვეთზე დარჩენილი ნაწვერალისთვის ცეცხლის წაკიდებას მათი დაწვის მიზნით, რაც დიდ ზიანს აყენებს როგორც ნიადაგს ასევე გარემოს, არსებობს მიმდებარე ნაკვეთებზე, მინდვრებზე, ტყეებზე ან დასახლებულ პუნქტებზე ხანძრის გავრცელების ძალიან დიდი ალბათობა, რამაც შესაძლებელია სავალალო შედეგები გამოიღოს. ვინაიდან დღეისათვის კანონმდებლობაში არ არსებობს ამ სახის პირდაპირი გათვალისწინებული სამართალდარღვევა და შესაბამისად სანქცია, მიზანშეწონილია რომ ამ ქმედებისათვის არსებობდეს შემაკავებელი ეფექტის მქონე ადეკვატური ადმინისტრაციული ჯარიმა. სწორედ ამ მიზეზით შეირჩა კანონპროექტით გათვალისწინებული საჯარიმო თანხების კონკრეტული ოდენობები და ჩაითვა, რომ ჯარიმის შემოთავაზებულ ოდენობას ექნება შემაკავებელი ეფექტი. ჯარიმის ოდენობა განისაზღვრა შემდეგი პრინციპით: მოსავლის აღების შემდეგ, სასოფლო-სამეურნეო სავარგულის მფლობელმა უნდა უზრუნველყოს სავარგულზე დარჩენილი ნაწვერალს ან მოგროვება და გატანა სავარგულიდან ან უნდა მოახდინოს მისი ჩახვნა ნიადაგში, რაც გარკვეულ

ხარჯებთან არის დაკავშირებული და ამ ხარჯების თავიდან აცილების მიზნით ისინი წვავენ დაეჩენილ ნაწვერალს. პროექტით გათვალისწინებული ჯარიმის ოდენობა რამდენჯერმე აღემატება ამ ხარჯებს, რათა სავარგულის მფლობელს არ უღირდეს სამართალდარღვევის ჩადენა და უზრუნველყოს ნაწვერალის განადგურება ისე რომ ზიანი არ მიაყენოს გარემოს. ამასთან, ჯარიმის ოდენობა არის ადეკვატური და შესაბამისობაშია სამართალდარღვევის სიმძიმესთან.

ასევე, 128<sup>3</sup> მუხლის პირველი ნაწილის თანახმად, სახერხი საამქროს მიერ სპეციალური ფირნიშის საკონტროლო ფირნიშის წარმოუდგენლობის შემთხვევაში თითოეული საკონტროლო ფირნიშისთვის დამატებით დგინდება ჯარიმა 50 ლარის ოდენობით, რაც განპირობებულია იმ გარემოებით, რომ ხშირია შემთხვევები როდესაც სახერხ საამქროს მფლობელები გამიზნულად არ წარმოადგენენ საკონტროლო ფირნიშს და ცდილობენ თაღლითური გზით ხელმეორედ გამოიყენონ ფირნიში სხვა უკანონო მორისთვის. აღნიშნული ქმედებისათვის საჯარიმო სანქციას მიუხედავად წარმოუდგენელი საკონტროლო ფირნიშების რაოდენობისა, არის 500 ლარი რაც თავის მხრივ არ ქმნის შემაკავებელ ეფექტს სახერხ საამქროებისათვის და ასევე არასამართლიანია, ვინაიდან ერთი სპეციალური ფირნიშის წარუდგენლობა და 100 სპეციალური ფირნიშის წარუდგენლობაც ისჯება ერთნაირად. ამგვარად, პროექტი ითვალისწინებს, რომ გარდა დადგენილი ფიქსირებული 500 ლარიანი საჯარიმო სანქციისა, დამრღვევს აგრეთვე დაეკისრება დამატებით თითოეული წარმოუდგენელი საკონტროლო ფირნიშისთვის 50 ლარი. 50 ლარის დამატებითი ჯარიმის სახით დაწესება არის ის ოპტიმალური ოდენობა რაც შესაბამისობაში იქნება სამართალდარღვევის სიმძიმესთან და ექნება შემაკავებელი ეფექტი.

**ბ<sup>1</sup>) ბავშვის უფლებრივ მდგომარეობაზე კანონპროექტის ზეგავლენის შეფასება:**

კანონპროექტი არ მოახდენს ზეგავლენას ბავშვის უფლებრივ მდგომარეობაზე.

**ბ<sup>2</sup>) გენდერული თანასწორობის მდგომარეობაზე კანონპროექტის მოსალოდნელი ზეგავლენის შეფასება:**

კანონპროექტს არ აქვს მოსალოდნელი ზეგავლენა გენდერული თანასწორობის მდგომარეობაზე.

**გ) კანონპროექტის მიმართება საერთაშორისო სამართლებრივ სტანდარტებთან:**

**გ.ა) კანონპროექტის მიმართება ევროკავშირის სამართალთან:**

კანონპროექტის მიღება არ ეწინააღმდეგება ევროკავშირის სამართალს.

**გ.ბ) კანონპროექტის მიმართება საერთაშორისო ორგანიზაციებში საქართველოს წევრობასთან დაკავშირებულ ვალდებულებებთან:**

კანონპროექტი არ ეწინააღმდეგება საერთაშორისო ორგანიზაციებში საქართველოს წევრობასთან დაკავშირებულ ვალდებულებებს.

**გ.გ) კანონპროექტის მიმართება საქართველოს ორმხრივ და მრავალმხრივ ხელშეკრულებებთან და შეთანხმებებთან, აგრეთვე, ისეთი ხელშეკრულების/შეთანხმების არსებობის შემთხვევაში, რომელსაც უკავშირდება კანონპროექტის მომზადება, – მისი შესაბამისი მუხლი ან/და ნაწილი:**

კანონპროექტი არ ეწინააღმდეგება საქართველოს ორმხრივ და მრავალმხრივ ხელშეკრულებებს და შეთანხმებებს. აგრეთვე, კანონპროექტის მომზადება არ უკავშირდება რომელიმე ხელშეკრულებას/შეთანხმებას.

გ.დ) არსებობის შემთხვევაში, ევროკავშირის ის სამართლებრივი აქტი, რომელთან დაახლოების ვალდებულებაც გამომდინარეობს „ერთი მხრივ, საქართველოსა და, მეორე მხრივ, ევროკავშირსა და ევროპის ატომური ენერჯის გაერთიანებას და მათ წევრ სახელმწიფოებს შორის ასოცირების შესახებ შეთანხმებიდან“ ან ევროკავშირთან დადებული საქართველოს სხვა ორმხრივი და მრავალმხრივი ხელშეკრულებებიდან:

ასეთი არ არსებობს.

დ) კანონპროექტის მომზადების პროცესში მიღებული კონსულტაციები:

დ.ა) სახელმწიფო, არასახელმწიფო ან/და საერთაშორისო ორგანიზაცია/დაწესებულება, ექსპერტი, სამუშაო ჯგუფი, რომელმაც მონაწილეობა მიიღო კანონპროექტის შემუშავებაში, ასეთის არსებობის შემთხვევაში:

ასეთი არ არსებობს.

დ.ბ) კანონპროექტის შემუშავებაში მონაწილე ორგანიზაციის/დაწესებულების, სამუშაო ჯგუფის, ექსპერტის შეფასება კანონპროექტის მიმართ, ასეთის არსებობის შემთხვევაში:

ასეთი არ არსებობს.

დ.გ) სხვა ქვეყნების გამოცდილება კანონპროექტის მსგავსი კანონების იმპლემენტაციის სფეროში, იმ გამოცდილების მიმოხილვა, რომელიც მაგალითად იქნა გამოყენებული კანონპროექტის მომზადებისას, ასეთი მიმოხილვის მომზადების შემთხვევაში:

ასეთი მიმოხილვა არ მომზადებულა.

ე) კანონპროექტის ავტორი:

საქართველოს გარემოს დაცვისა და სოფლის მეურნეობის სამინისტრო.

ვ) კანონპროექტის ინიციატორი:

საქართველოს მთავრობა.